

Pa di 20 aña consecutivo

Quota Club Aruba promoviendo cuído di bo oído

A entrega “ear plugs” na Minister Michelle Winklaar



E organisacion Quota Club Aruba ta existi pa 25 aña caba y desde 20 aña pasa a inicia cu nan campaña pa promove cuído di oído durante temporada di carnaval. Esaki ta posibel danki na e sosten di Refineria Valero. Cu esaki e club ta bende “ear plugs” na un prijs simbolico y hopi abou. Danki na e sosten di WEB Aruba N.V., e aña aki a logra haya “ear plugs” pa mucha chikito tambe.

Pa Quota Club Aruba, ta importante pa Gobierno pasa un ley den cual ta atende cu e nivel di zonido durante eventonan publico, manera por ehempel carnaval. Ta inaceptabel cu den e temponan moderno aki ta laga bandanan musical cu sistema di zonido moderno, ta toca duro y cu ta laga hendenan grandi y muchanan cu problemanan di oído. Pa Quota Club ta importante cu e comunidad ta compronde cu perdida di oído no ta algo temporal, sino permanente. Un bon ehempel sin duda ta e grupo “Los Laga Bay” y su banda “Robert Jeandor y su Solo Banda Show” cu desde 20 aña pasa ta cumpra “ear plugs” pa e integrantenan y pa tur e participantenan den e grupo di carnaval. Di e

forma aki nan ta muestra nan sosten na e campaña di Quota Club pero tambe ta percura pa cuida nan oído. Durante un ceremonia cortico diabierna ultimo den sala di prensa di Consejo di Minister, a organisacion a haci entrega di “ear plugs” na Minister di Asuntonan Economico, Asuntonan Social y Cultura, esta Minister Michelle Hooyboer-Winklaar. Durante e ceremonia a enfatisa cu e organisacion ta tene e campaña aki tur aña pa conscientisa e pueblo riba perdida permanente di nan oído dor di baila tras di speakernan cu zonido duro. E grupo cu Quota Club kier purba yega na dje ta specialmente e hobennan entre 10 pa 15 aña di edad. Claro cu ayudo di e mayornan den esaki tambe ta masha importante. E mensahe ta pa e bandanan baha e musica, pasobra e volumen no mester ta halto pa e participantenan por gosa. Ta e calidad mester ta bon! Cu e consejo aki awor, ta spera cu mayornan proteha nan yiunan den e dianan aki di paradanan di carnaval y proteha nan mes tambe dor di cumpra y bisti “ear plugs” tanto den parada como tambe para banda di caminda.